

Asasakka maani najuuttusi tamassi.

Nuannaarutigaaara ullumi ulloq Pujortarfiunngitsaq eqqorlugu, suliffeqarfiit assigiinngitsut pujortarfiujunnaarnissaannik Inuunerittamit isumaqatigiissusiorfiginissaat, nuannaarutigaaaralu maani Katuami isumaqatigiissusiorfigisassatta ilaanni katersuussinnaagatta.

Nunarsuarmioqatigiit Peqqinnissaq Pillugu Suliniaqatigiiffiata (WHO-p – World Health Organisation) maajip 31-iat ullortut Pujortarfiunngitsutut nalunaarutigaa.

Ullutsinni nunatsinni pujortartarneq ajoraluartumik atugaasorujussuuvoq, pujortartanngitsut ilanngullutik pujumoonnikkut pujortartarput. Ilisimavarpullu ukiuni kingullerni 30-ni pujortartarnerup kingunerisaannik puakkut kræfteqalersartut 400%-mik amerlisimasut. Tamanna Naalakkersuisunit Akuerisinnaangilarput. Taamaattumik Inuunerittami Naalakkersuisut suliniuteqarfisaaattut Pujortartarneq ilanngunneqarsimavoq. Inuunerittami siunertat pingaarnersaat tassaavoq innuttaasut namminneerlutik peqqinnerminnik akisussaaffeqarnerulernissaat.

Tamannali Naalakkersuinikkut taamaallaat anguneqarsinnaanngilaq.

Tulluusimaarutigaaaralu ullumi suliffeqarfiit sulisumik peqqinnerannik akisussaaqataanertik takutimmassuk. Suliffeqarfinni pineqartuni sulisut peqqinnerminnik siuarsaaqataanissaminut periarfissinneqarput, tamannalu qularutissaanngitsumik sulisut ilaquttamik peqqinnerannik siuarsaaqataanerulernissaannik aamma kinguneqassalluni.

Ullumikkut suliffeqarfiit PAARISAp ataani suliniummut Inuunerittamut pujortarfiujunnaarnissamik isumaqatigiissusiorlut tassaapput: Katuaq aamma TELE-Post Greenland - nuna tamakkerlugu.

Innuttaasut suliffeqarfiilluunniit piunassusertik tunngavigalugu suliniuteqarneranni Inuunerittamut Peqqinneq Pillugu Isumaqatigiissusiorsinnaapput. Suliffeqarfiit Inuunerittallu isumaqatigiissutaannut ilaavoq, ukunani suliffeqarfinni pineqartunit sulisut pujortartartut pujortarunnaarnissamik neqeroorfigineqartarnissaat. Pujortarunnaarniarluni ilitsersuisunik pikkorissartitsinerit PAARISAmis isumagineqartarput, kiisalu suliffeqarfiit pujortartarnermut politikkeqarnissaannut siunnersorneqartarlutik.

Innuttaasut peqqissuunerat siuarsarneqassappat pingaartuuvoq suliffeqarfiit akimorlugit suleqatigiinnissaq. Tamattami siunertariuarparput peqqissuunissarput, tamannali peqqinnissaqarfimmit taamaallaat suliarineqarsinnaanngilaq. Tassami nunarsuarmi tamani misissuisarnerpassuit takutippaat inuup peqqinnerminik naliliisarnera avatangiisaanut attuumasorujussuusoq. Inuk nammineq timikkut tarnikkullu peqqissutut nalilertarpoq inigissaartuuguni, ilinniarsimasuuguni, suliffeqaruni, inuuniarnermut naleqquttumik aningaasarsiaqaruni kiisalu inunnut attaveqarluartuuguni.

Ullumi suliffeqarfiit isumaqatigiissummik atsioqatigisassatta takutippaat sulisuminnik sullitaminnillumi aamma akisussaassuseqarnertik.

Nuannaarpunga Naalakkersuisoqatikka sinnerlugit tamanna atsioqatigiinnikkut aqutissiuussinnaagakku.

Qujanaq - suleqatigiinnitta ingerlateqqinnissaa qilanaara!